

La fe sens òbra mòrta es

Aquela dintrada
es doncas a l'encòp
un avertiment e una
promessa...

Amics, amigas,

Ongan, la dintrada que se sarra serà pas coma las autras, mas una aventura novèla per l'IEO d'Ariège: d'un costat vam e voluntat, de l'autre una realitat budgetària malaisida que nos forcèt de prene una decision dolorosa.

Per manca de mejans financers, podèm pas mès gardar la nòstra professora salariada, qu'a tant donat amb son seriós, sa competéncia e son estrambòrd. Aquí, un còp mès li vòli díser tota la nòstra gratitud.

Aquela causida es pas brica una fin: mòstra al contrari nòstra determinacion per contunhar, a tot pèdre. Las activitats s'arrèstan pas. Mas caldrà que l'implicacion dels benevòls siá mès fòrta, per provar que nòstra lenga e nòstra cultura comptan pro per que cadun i balhe de son temps, de son energia e de son còr. Es un desfis, mas tanben l'escasença de tornar inventar nòstres biaisses de fèr, de téisser d'una altra mòda le ligam entre aprenents, militants, afogats d'occitan e un public novèl, ja que son fòrça les que se cèrcan identitat e rasigas. Dins aquela amira, una serada de sosten es prevista fin d'agost a La Ròca d'Olmés. Dins aquesta passa malaisida servirà plan segur per recaptar moneda entà finançar las nòstras activitats e sosténer projectes novèls, servirà tanben a crear de convivialitat entre les aderents que se van tornar trobar per un moment festiu e amical, çò que dona vam, servirà tanben a valorizar

la cultura occitana e a balhar de visibilitat a l'associacion per benlèu tocar un public novèl.


Espèri qu'aquesta serada serà tant escasuda coma la precedenta de 2024, gràcias a l'implicacion del public e a la generositat dels artistas.

Les vòli aquí grandmercejar: venon benevòlament, per amistat, per que la lenga e la cultura occitanas pòscan contunhar de viure e de s'espandir. Òsca!

Solide, aquesta etapa mòstra las fragilitats estructurals del movement associatiu occitan e nos buta a pensar amassa l'avenir: cossí assegurar la transmission, cossí trobar sostens novèls, cossí recampar nòstras fòrças per que l'occitan aja la plaça que s'amerita. Mas vòli tanben afortir un messatge d'espèr: l'IEO d'Ariège es totjorn viu. Les corses se tendràn, les projectes se faràn. L'occitan l'ausirem, le parlarem, le cantarem e contunharem de le partejar dins Ariège. Es dins la solidaritat que trobarem la fòrça d'anar totjorn en davant.

Aquela dintrada es doncas a l'encòp un avertiment e una promessa: l'avenir depend de nosautres totes. Mès que jamès, avèm besonh de vòstra preséncia, de vòstra participacion, de vòstra fisança. Amassa anirem mès luènh e contunharem de far viure l'occitan, atal entre totes ac farem tot.

Annia Wolf – Presidenta



SOIRÉE de SOUTIEN-IEO-Ariège
29 AOÛT - LAROCQUE D'OLMES
SALLE DE LA MJC
18h-Popol
19h-Petite restauration
20h30 - CONCERT
Eric Fraj
Morgan Astruc
22h- bal: Mathys Marie
Gérard Garrigues
Jean-Mi Maurel



Qualques datas pel mes de Setembre

10 e 17 /09/2025

Pàmias

Talhièr de convèrsa del Cercle occitan Prospèr Estieu

Contact: ostaloc09@orange.fr – 05 81 06 03 88



20/09/2025

Ròcafuèlh

Teatre amb les Galejaires « Jogarem pas a Tolosa » a 20h30

Contact: ieo09@orange.fr – 05 81 06 03 88

26/09/2025

Alzenh

Teatre amb les Galejaires « Es còit le fetge gras » a 20h00

Contact: ieo09@orange.fr – 05 81 06 03 88



Dimècres 24 de setembre

TORNA PRENE LE TALHIÈR DE CANT AMB PASCALA RESPAUD

a la Bastida de Seron a 18h30

Contact : pascale.respaud@gmail.com



EMISSIONS DE RÀDIO
Cada jorn a 12h32 e 18h52 - De còr e d'òc sus Radio Transparence 93.7FM
Cada dimars de 19h00 a 20h00 - Era votz dera montanha sus Radio Couserans 94.7FM

Setembre e... la dintrada!

La dintrada dels talhièrs per adultes de l'IEO d'Arièja se sarra.

Vos comunicar le calendèr de las represas es tanben l'escasença de mercejar e saludar le monde que contunhan o s'endralhan a l'animacion dels corses!

• **St-Guironç**
amb Claudina Solhà
Dimècres 24/09
Debutants: 17h00-18h30
Confirmat: 18h30-20h00

• **Pàmias**
Diluns 22/09
Debutants: 9h30-11h00
amb Elena Laffont
Dijòus 25/09
Confirmats: 9h30-11h00
amb Maria Àngel Lagarda


• **Foish**
Dimars 30/09
Totes nivèls: 17h00-18h30
amb Annia Wolf

• **L'Avelhanet**
Dijòus 25/09
Totes nivèls: 14h00-16h00
amb Evalina Houlès

Tarifas dels corses

- Tarifa de basa: 195,00€
(siá 165€ + 30€ escotison individuala)
- Tarifa reducida*: 130,00€
(siá 118€ + 12€ escotison individuala reducida)
- Tarifa coble basa: 287,00€
(siá 247€ + 40€ escotison coble)
- Tarifa coble reducida: 263,00€
(siá 247€ + 16€ escotison coble reducida*)

**Las tarifas de las escotisons son votadas per l'IEO Federal e s'aplican a todas las seccions. Le principi de tarifa reducida s'aplica sus presentacion d'un certificat de non imposicion sul revengut.*



CORSES E TALHIÈRS D'OCCITAN

ESCRUI, LEGÍS, ESCÀMBIA... E...

...PARLA!

2025-2026

DINS ARIÈJA

INSTITUT D'ESTUDIS OCCITANS D'ARIÈJA
Espaci occitan-II rue H.Fabre-09100 PAMIEÏRS
05 81 06 03 88 - ieo09@orange.fr

● <https://arieja.ieo-opm.com>



ENTRESENHAS:
05 81 06 03 88
ieo09@orange.fr





Cronica d'Alan Vidal

Una pagina se vira

Parlem de doas personas que se son entrevistas pendent una quinzena d'annadas. Caduna seguissiá son camin, l'una amb le pes dels ans, l'autra amb le vam de la junèssa mès malgrat que fusquèsson plan separadas, venguèron a se crosar.

Se se coneguián plan? Pensi pas, ja que parlavan pas gaire de lor vida, sens jamès se plànher de qué que siá, just çò que caliá per pas tombar ni dins le desinterés ni dins la curiositat malsana.

S'èran grands amics? Probablement pas, levat qu'existisquèsse una amistat en darrèr, silenciosa e distant, coma l'amor cortés dels trobadors.

Sustot que s'encontravan rarament, al moment d'amassadas diversas, just le temps d'un pauc colhonar e d'escambiar quelques mots. Les corrièls asseguravan una comunicacion minimala, sens rasonaments inutills, just çò que cal per avançar.

Relacions doncas episodicas mès ligadas de benvolença, d'afinitats naturalas, d'ajudas recipròcas, de respècte mutual, d'empatia, de sinergia, de complicitats e de fisança partejada.

Mès la vida vira sas paginas e a un moment donat les camins s'escaralhan, l'un contunha de s'arrossegat e l'autre s'escapa cap a monts desconeguts... Benlèu qu'un jorn farà repè e tornarà. A sapier?

Pas res d'extraordinari dins aquela istòria d'una banalitat a ne fèr ríser, ja qu'ac sabètz, tota l'umanitat viu de relacions, bonas o dolentas, simplas o complicadas... Mès perqué alavetz l'aver contada? La responsa n'es simpla e fòrt anciana: perque èra ela, perque èra ieu.

EURÒCVISION 2025

QU'ES AQUÒ?

Encoratjar l'expression de l'oralitat: Creacion dins las esteticas totas de l'oralitat, cants e musicas, corals, contes, poesia.

Territòri: a l'opausat de la mondializacion, valorizar los territòris, lòcs de produccions de las empresas collectivas e individualas.

PER QUI?

L'eveniment *Euròcvision en Gasconha* es lo rendètz-vos dels creators.trises, cantaires.as, musicaires.as, poètas, contaires.as... qu'exprimisson lo territòri, sa sensibilitat e sas emocions.

COSSÍ PARTICIPAR?

En vos exprimir: Contactatz-nos per conéisser lo reglament del concors e participar (entresenhas sus facebook *Euròcvision en Gasconha*). En integrar l'organizacion d'*Euròcvision en Gasconha* e constituir una jurada.

COSSÍ AJUDAR?

En sostèner: Vos avèm besonh, publics, privats, empresas, associacions, personas fisicas per fèr espelir aquela primièra edicion.

**Prèmis e recompensas
seràn atribuïts per una
jurada**

Enregistrament, difusion
d'un CD collectiu, virada,
concèrts, convit residéncias
d'artistas



CONCOURS
EURÒCVISION
EN GASCONHA 2025

VALORISONS
VOS CRÉATIONS ARTISTIQUES EN ÒC !

VALORISEM
LAS VÒSTAS CREACIONS ARTISTICAS EN ÒC !



**PRIX
MUSIQUES
AMPLIFIÉES**



**PRIX
GROUPES &
CHORALES**




**PRIX
JEUNES
CRÉATEURS**



**PRIX TEXTES
CLAMÉS &
CONTES**



**PRIX LANGUES
VERNACULAIRES**



**PRIX FAMILLE
DE LANGUE D'OC**



**PRIX
PORTEURS DE LANGUE**



Info
eurocvision@orange.fr
Tél 05 59 21 89 92
www.radiopais.fr



La Cronica de Claudina Solhà

Helmot

Que i a uns qüantis dias qu'agèrem un messatge de la meria: “Aqueste dimècres que deploram la mort d'Helmot K. deth Sarrath deth Hogar. Que vos tieram al corent per la seguida.” Aquel nom que'm ditz quicòm.

Quand demorava a Bocenac, que coneguè pus o mens aquel personatge en çò d'amics. Un marginal, allemand d'origina, grand, magre, ja mercat per la vida. Que vivia en una cabana a la limita de la meva comuna e de la de Bièrt. Ja chiu portat aishús la beveta, ça'm semblèc.

E quand me'n venguè a Èrp que'l tornè a trobar, vivent en una bòrda adobada al cap de la comuna. Que miava una autò del temps de l'an Ceset, non passada al contra-ròtle desempueish non sai quand, soenh en pana, e que li servic pr'aquò and'anar entrò Sent-Gironç fèr le plen de sas victualhas necessàrias. Quand òm le crosava aishús la rota, que valia mès estremar's.

De qué vivia? Que trebalhava coma ajuda maçon quand avia besonh sòuses. Que sembla qu'èra pro adret e que's tenguia al chantièr, al mens un tempsòt. Portant, que venguia d'una familha damb moièns: les sèvis que fasian marchar una empresa a Hamborg. Qu'èran vengudis ací and'ensajar de recuperar'l-se, mes que non volguèc cap seguir-les.

Ja fasia tanbens un òrt, amb açò que calia. Que i ajustava duas rengadas de milgròs, e entram, chiu a l'amagat, una de canabís. Andà el solament, ça disia. E, en un coenh, un polit pè d'aconit, flor verimosa de montanha.

Portant, un còp, non sai se perqué, qu'ensajèc de tornar al país. Que i anèc en autò. Ja passèc la frontièra sense problèma. Mes uns quilomètres après que's fic arrestar. Veïcul fosegat de cap a fons: que i descobríren canabís. Ja l's-i diguèc qu'èra andà sa consomacion personala, mes la lei que s'apliquèc; quinze dias de gabinhòla, e, a la deishida, tornar partir de l'autè sens lèu fèt.

Andà poder susviver, que metèc la sèva maison en viagèr. Que la cromptèc un coble de novèlis vengudis al país, trebalhaires e bravis, que's son ocupadis d'el entrò'l derrèr moment.

Coma agèc una vida marginala non'podia cap morir coma tot le mond. Le sèu estat que's desgradava fòrt. Quin atge avia? De mal díser. Setanta-qüate ans. Mercat pel temps e la beveta, ara que n'avia mar de viver.

Un dia de julhet que cagèc, que's fic mal a las costèlas al punt de respirar en malengüera. La femna que s'ocupava d'el que'l voliá portar a l'espital. Non! Al medacin. Non! E que patiá! Que li diguèc: “Se non va melhor deman que calderà pr'aquò préner una decision. - Be veiram”. E que's quitèren atal.

La nhet mèma, que s'anèc recuperar la rasic de l'aconit, que la lavèc, e que la talhuquèc. E que la masteguèc e envalar-la, en tot fent-la devalar amb una botelha d'alcòl; que l'adormic en seguida.

Le lendeman, que'l trobèren mort. Avertir la sèva amiga, soar al medacin, als gendarmas, enquèsta, autopsia. E tot le bordèl dels papèrs a procurar's, a fèr vié d'Alemanha, a contactar la familha, e aver les acòrdis andà poder fèr las desmarchas. Que fuc incinerat al crematorium de Pàmias. Pas question de passar per la glèisa.

Les qüalquis amics, soenh marginals coma el; qu'an decidat de fèr una fèsta al sèu nom, a Seteme, al Còl de Bèç. Una istòria al mièg d'un flòc d'autas...

PARUCION

Letras d'Òc edita un libre novèl d'Andrieu Lagarda!



Contes risolièrs, cresenças e legendas

Aquí una garba novèla de contes cortets d'Andrieu Lagarda.

De contes risolièrs, de legendas enrasigadas dins son país, o de cresenças a las encantadas, a las brèishas o als armièrs.

De racontes que pòdon portar paur o gaug, e fan sovenir de farcejares que se trufan del monde.

I a de qué rire e somiar.

L'enregistrament de l'integralitat dels contes acompanya lo tèxte escrit.

La votz calorosa d'Alan Vidal dona vida als racontes, dins un occitan familiar que sap demorar fidèl a la bona prononciacion de la lenga d'òc.

86 p. format 15 x 21 cm

Livre + CD: 15,00 €


ISBN 978-2-37863-072-0

→ L'IEO Arièja vos prepausa, se sètz interessats, de fèr una comanda gropada a l'editor.

Nos podètz avisar per telefon o per corric ducas lo 15 de setembre.

Mots crosats

d’Andrieu Colosetti



Orizontalament

I- Afortir. II- Per far la moleta. III- Truèja per la carn. Li. IV- Projècte. Ara. V- Pichon riu. Conjoncion. Per volar. VI- Del vèrb èsser. Article. VII- Que se vanta. VIII- Alavetz. Çaquelà pas bèstia. IX- Gadalas. X- Coma mòrt. Pronom personal.

Verticalament

1- Gabre. Per la fielaira. 2- Un risolet. 3- Pòble del nòrd. Cremat. 4- Mòrt. Pichon flum. 5- Garda pas. Vesin d’Occitània. 6- Ausèl de nuèit. Pronom. Vocalas. 7- Pichon gòlf. Pas aprèp. 8- Contrari de venguda. Per far còire. 9- Consonantas. Pronom. Es pas imaginat. 10- Romiaire d’Arièja. Possessiu.

	1	2	3	4	5	6	7	8	9	10
I										
II										
III										
IV										
V										
VI										
VII										
VIII										
IX										
X										

Solucion dins la letra mesadièra venenta